

दिनांक 27.09.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- उपराष्ट्रपति जगदीप धनखड़ कह्यो—शांति बणायी राखण मांय सैर—सपाटा रो मोटो काम।
- सूचना अर प्रसारण राज्य मंत्री एल मुरुगन नकारात्मकता पैदा करण वाळी खबरां माथे रोक लगावण बाबत कह्यो।
- एक पेड मां के नाम अभियान रा तैत देशभर मांय 80 करोड़ ऊं बत्ता पौधा रोपी ज्या।
- प्रदेश रा केई हलकां मांय मांय आज बिरखा रा समाचार।

000

उपराष्ट्रपति जगदीप धनखड़ कह्यो है के पर्यटन लोगां ने आपस में जोड़े है जो बगत री जरूरत है। वे आज विश्व पर्यटन दिवस रे मौके नई दिल्ली मांय राखी ज्या जळसा मांय बोल रह्या हा। धनखड़ कह्यो के सैर—सपाटा रो शांति बणायी राखण मांय मोटा काम व्हे है। वे कह्यो के विश्व पर्यटन दिवस रो ई साल रो मुद्दो — **पर्यटन और शांति** भारत रा लोकतंत्र सारू ई उपयुक्त है। ई मौके पर्यटन मंत्री गजेन्द्र सिंह शेखावत कह्यो के सैर—सपाटा रे मार्फत न्यारी—न्यारी संस्कृतियां अर देशां बीचे समझ बढ़ाई जा सके है। कार्यक्रम मांय उपराष्ट्रपति पर्यटन मंत्रालय री पर्यटन मित्र अर श्रेष्ठ पर्यटन गांव होड़ सरीखी न्यारी—न्यारी पहलां री सरुआत कीनी। विश्व पर्यटन दिवस रे मौके प्रदेश मांय ई आज न्यारा—न्यारा कार्यक्रम राखी ज्या अर सैलाणियां ने सरकारी स्मारकां ने मुफ्त निरखण रो मौको दियो ज्यो। झालावाड़ मांय ऑनलाईन तरीका ऊं राष्ट्रीय स्तर री प्रश्नोत्तरी होड़ राखी ज्यी। आज संवारे सूर्य मंदिर झालरापाटन मांय लोक कलाकार बिन्दौरी लोक नृत्य पेश कीनो। ई पाछे सेमिनार राखी ज्यी अर पौधा रोपी ज्या अर सांस्कृतिक कार्यक्रम पेश करी ज्यो।

जैसलमेर मांय ज्वनतपेड चम्बम मुद्दा माथे राखी ज्या कार्यक्रम मांय नामी कलाकार परम्परागत राजस्थानी लोकसंगीत गाया। वठे देशी—परदेशी सैलानियां रो माळा पहरा र स्वागत करी ज्यो। ई मौके नगरपरिषद री ओर ऊं सैर सपाटा री खास ठौड़ां ने रंग— बिरंगी रोशनी सागे सजायी ज्यी। सरकारी संग्रहालय मांय पर्यटन विभाग री ओर ऊं स्वच्छता अभियान चलायी ज्यो। अजमेर मांय मोटी तादाद मांय लोग ऐतिहासिक धरोहरां ने देखी। वठे प्रशासन री ओर ऊं सांस्कृतिक कार्यक्रम अर कच्ची घोड़ी नाच रो कार्यक्रम राखी ज्यो। **उदयपुर** मांय ई न्यारी—न्यारी ठौड़ां सैलाणियां रो स्वागत करी ज्यो अर कार्यक्रम राखी ज्या।

000

उपराष्ट्रपति जगदीप धनखड़ काल जयपुर रा एक दिन रा दौरा सारू पधारेला। इस दौरान उपराष्ट्रपति एक निजी स्कूल में शिक्षकों और छात्रों से संवाद करेंगे।

000

सूचना अर प्रसारण राज्य मंत्री एल मुरुगन कह्यो है के देश अर समाज बणावण मांय मीडिया रो मोटो काम है। वे आज माउंटआबू रा ब्रह्मकुमारी संस्थान मांय राखी ज्यी मीडिया कार्यशाला मांय बोल रह्या हा। मुरुगन कह्यो के समाज मांय नकारात्मकता पैदा करण वाळा समाचार छपण अर प्रसारित व्हेवण ऊं रोकण री म्हाणी नैतिक ज़िम्मेदारी है। वे कह्यो के विकसित भारत रो सपनो सांचो करण मांय मीडिया रो खास काम है। मुरुगन मीडिया ने बत्ती सावचेती, जागरूकता अर ज़िम्मेदारी सागे काम करण सारू कह्यो। वे कह्यो के ओ.टी.टी. प्लेटफॉर्म अर सोशल मीडिया रे ज़रिए बतायी जा रही सामग्री समाज सारू खतरनाक है। मंत्री कह्यो के सरकार ब्रॉडकास्टिंग सर्विस रेगुलेशन बिल 2024 रे मार्फत हर भांत रा मीडिया रा बारा मांय सगळा हितधारकां ऊं राय माँगी है। वे कह्यो के ई बिल रो मकसद मीडिया माथे काबू करणो नी है, बल्कि मीडिया मांय नैतिक मूल्यां री स्थापना करणो है। केंद्रीय मंत्री ब्रह्मकुमारी संस्थान रो दौरा कर र वठे चलायी जा रही न्यारी—न्यारी परियोजनावां रा काम ई देख्या।

संसद री न्यारा-न्यारा मंत्रालयां ऊं जुड़ी स्थायी समितियां बणा दीरीजी है। भारतीय जनता पार्टी रा भर्तृहरि महताब वित्त समिति रा जद के कांग्रेस रा शशि थरूर विदेश मामलां री समिति रा अध्यक्ष बणायी ज्या है। पैली वाळा केंद्रीय मंत्री राधा मोहन सिंह रक्षा समिति रा अध्यक्ष व्हेला। राष्ट्रवादी कांग्रेस पार्टी-एनसीपी रा सांसद सुनील तटकरे पेट्रोलियम अर प्राकृतिक गैस समिति रा अध्यक्ष बणायी ज्या है। शिवसेना रा श्रीरंग अप्पा बार्ने ऊर्जा समिति रा अध्यक्ष व्हेला। कांग्रेस रा सांसद चरणजीत सिंह चन्नी कृषि, पशुपालन अर खाद्य प्रसंस्करण समिति रा मुखिया व्हेला। जनता दल (यू) रा संजय झा परिवहन, पर्यटन अर संस्कृति समिति रा जद के टीडीपी रा मगुंटा श्रीनिवासुलु रेड्डी आवास अर शहरी मामलां री समिति रा अध्यक्ष व्हेला।

पैली वाळा केंद्रीय मंत्री अर भाजपा रा सांसद अनुराग ठाकुर कोयला, खान अर इस्पात समिति रा जद के राजीव प्रताप रूडी जल संसाधन समिति रा अध्यक्ष बणायी ज्या है। समाजवादी पार्टी रा सांसद राम गोपाल यादव स्वास्थ्य अर परिवार कल्याण समिति रा जद के भाजपा रा बृजलाल कार्मिक, लोक शिकायत, कानून अर न्याय समिति रा अध्यक्ष व्हेला। कांग्रेस रा सांसद दिग्विजय सिंह ने शिक्षा, महिला, बाल, युवा अर खेल समिति रा जद के टीएमसी री डोला सेन वाणिज्य समिति री अध्यक्ष बणायी ज्या है।

000

देश मांय एक पेड़ मां के नाम अभियान रा तैत हाल ताई अस्सी करोड़ ऊं बत्ता पौधा लगा दिया ज्या है। पर्यावरण, वन अर जलवायु परिवर्तन मंत्रालय रे मुजब ओ काम तैय मियाद ऊं पांच दिन पैली 25 सितम्बर ने ई पूरो कर लियो ज्यो। उत्तरप्रदेश मांय सब ऊं बत्ता 26 करोड़ पौधा रोपी ज्या। प्रधानमंत्री नरेन्द्र मोदी ई साल 5 जून ने विश्व पर्यावरण दिवस रे मौके नई दिल्ली मांय एक पेड़ मां के नाम अभियान री सरूआत कीनी ही।

000

राज्य मांय स्वच्छता पखवाड़ा रा तैत आज ई न्यारा-न्यारा कार्यक्रम राख्यी ज्या। भरतपुर मांय नगर निगम री ओर ऊं सफाई मित्रां सारू लगायी ज्या स्वास्थ्य शिविर मांय सफाई कर्मचारियां री ब्लड प्रेशर अर डायबिटीज समेत न्यारी-न्यारी बीमारियां री जांच करी ज्यी। ई दौरान कर्मचारियां ने प्रधानमंत्री आवास योजना, उज्ज्वला योजना अर आयुष्मान भारत योजना रा बारा मांय ई जाणकारी दीरीजी। नदबई मांय रैली निकाळ र साफ-सफाई राखण री अपील करी ज्यी। ई सागे ई बत्ता ऊं बत्ता पौधा रोप र पर्यावरण ने बचावण री अपील ई करी ज्यी। झालावाड़ मांय स्वच्छता ही सेवा अभियान री थीम **स्वभाव स्वच्छता संस्कार स्वच्छता** रा तैत नगर परिषद री ओर ऊं एक गैर सरकारी स्कूल मांय रंगोली माण्डण अर चित्रकला री होड़ां राख्यी ज्यी। शाहपुरा जिला मांय साफ-सफाई रा बारा मांय जाग जगावण सारू कनेछन कलां री लडकियां री सरकारी स्कूल मांय टाबरियां मानव श्रृंखला बणा र सफाई राखण रो संदेश दीनो। सर्वाईमाधोपुर मांय नगर परिषद री ओर ऊं आज नगर परिषद ऊं महावीर पार्क ताई स्वच्छता रैली निकाळी ज्यी। रैली रे मार्फत मनरेगा रा तैत काम करण वाळा मजूर, खुद सेवक समूहां री महिलावां अर नगर परिषद रा कर्मचारी साफ सफाई राखण रो संदेश दीनो। जोधपुर रा भारतीय हथकरघा प्रौद्योगिकी संस्थान मांय पत्र सूचना कार्यालय री ओर ऊं विद्यार्थियां सारू प्रश्नोत्तरी होड़ राख्यी ज्यी।

000

पाली री एक गैर सरकारी स्कूल मांय आज 5 साल ताई रा बच्चां ने स्वर्ण प्राशन दवा मुफ्त पायी ज्यी। प्रतापगढ़ रा सरकारी आयुर्वेद अस्पताल मांय ई आज मुफ्त स्वर्ण प्राशन संस्कार शिविर लगायी ज्यो। शिविर मांय 153 बच्चां ने स्वर्ण प्राशन दवा मुफ्त पाई ज्यी। स्वर्ण प्राशन दवा बच्चां रा बीमारियां ऊं लड़बा रा बूता ने बधावे है। 24 अक्टूबर ने ई स्वर्ण प्राशन संस्कार शिविर लगायो जावेला।

000

राज्य रा न्यारा-न्यारा हलकां मांय पड़ रही गर्मी बीचे आज केई ठौड़ां बिरखा व्ही। पाली जिला रा फालना, पीपला, सेवाडी अर बीसलपुर गांवां मांय बिरखा व्ही। भीलवाड़ा मांय दोपहरां री बगत हल्की बरसात व्ही, जिण ऊं गर्मी ऊं आराम मिल्यो। बाड़मेर जिला रा केई गांवां मांय ई आज तीजा पहर व्ही बिरखा ऊं साखां ने फायदो मिलेला। चौहटन मांय ज़ोरदार मेह बरस्यो। और जाणकारी म्हाणा खबरनवीस ऊं—

बालोतरा मांय सिंज्या री पोर बादळा मण्ड गया। डूंगरपुर मांय ई सिंज्यां री पोर व्ही बिरखा ऊं सड़कां माथे पाणी बहवण लाग्यो। सिरोही जिला रा आबूरोड़ अर माउन्टआबू समेत न्यारा-न्यारा हलकां मांय व्ही बिरखा ऊं मौसम सुहावणो व्हे ग्यो। भरतपुर मांय दोपहरां पाछे व्ही हल्की बरसात ऊं सीळो बायरो बाज्यो अर गर्मी अर उमस ऊं साता मिली। श्रीगंगानगर मांय दोपहरां री बगत जिला मुख्यालय, साधुवाली, रायसिंहनगर अर अनूपगढ़ हलकां मांय तेज अंधड़ सागे 15-20 मिनट ताई बिरखा व्ही। अंधड़ रे कारण खेतां मांय ऊबी साखां ने नुकसाण व्हेवण री शंका है। **उदयपुर** मांय ई सिंज्यां री पोर बिरखा व्ही। **सांचौर** मांय ज़ोरदार मेह बरस्यो। ई बीचे टोंक जिला मांय बिरखा करीब-करीब बंद व्हे जावण पाछे बीसलपुर बंधा मांय पाणी री आमद कम व्हे गयी है अर बंधा रा पांच दरूजा बंद कर दिया ज्या है। बंधा रो केवल एक दरूजो खोल र केवल 1 हजार 305 क्यूसेक पाणी निकाळ्यो जा रह्यो है। ई बीचे फलौदी मांय पारो 41 डिग्री सेल्सियस ने पार कर ग्यो। मौसम विभाग आज

जयपुर, कोटा, भरतपुर, अजमेर अर उदयपुर संभागां मांय कठे—कठे बिरखा रा आसार जताया है। जोधपुर संभाग मांय कठे—कठे बिरखा री संभावना है।

000

केन्द्र सरकार आज नई दिल्ली मांय नॉन—अल्कोहलिक फैटी लिवर डिजीज—एन.ए.एफ.एल.डी. रा बारा मांय चिकित्सा अधिकारियां सारू नुवा परिचालनगत दिशा—निर्देश अर प्रशिक्षण नियमावली जारी कीना। ई मौके स्वास्थ्य अर परिवार कल्याण सचिव अपूर्व चंद्र कह्यो के अ दिशा—निर्देश अर सिखावण रा मॉड्यूल एन.ए.एफ.एल.डी. रा मरीज़ां री पिछाण करण मांय मददगार साबित व्हे सके है। आकाशवाणी सागे खास बातचीत मांय इंस्टीट्यूट ऑफ लिवर एंड बिलियरी साइंसेज— आई.एल.बी.एस. रा निदेशक अर कुलपति डॉक्टर एस के सरीन बतायो के मोटापो फैटी लिवर बीमारी व्हेवण रो एक कारण है।

000